

847.

1435 Mai 21; (1424 März 1)

Die Räte des Kurfürsten schlichten einen Streit zwischen Niklas Funkel und Klaus von der Hart über einen Vertrag aus dem Jahr 1424.

fol. 155v-157r Wyssit das es beteydigit von unsers gnedigin hern rethe umbe sulchin irnisze und gebrechin, alz denne Niclasz Funkel uff eyne und Clausz von der Hart, beyde unsere eitgenoszen, uff dy andere syte keyn eyinander hattin, alz von eyns gemagkeltin briffes, wenne des abeschr(ieben) hir nachgeschreiben^{a)} stehit, ab es qweme, das Funkel addir syn erben, erbnemen und nachkomelinge von des gutes weyn, darobir der briff lutet, ymmer angereth addir beteydigit worde, des sich Funkel mit dem selbigin briffe machte geschuczczin und uffgehaldin, den om Clausz vorgnant vormagkelt und zu nichte gemacht hat, daz sal Clausz von der Hart addir syn erbin unde erbnemen mit syn eygin gute uszteydingin, entwerren und Funkelin, syne erbin und erbnemen gancz schadenlosz haldin, daz Clausz von der Hart oft gnant vor unsers gnedigin hern rethin dy czyt gancz gewillet hat und daz globet stette und gancz czu halden und von geheysz wegin des gnantin unsers hern rethe und nemelichin er Heinrich Laübingis, kanczczelers, habin wir desze schr(ift) zu wyszin in unser buch heyszin schribin. Actum sabbato vor ascensionis Domini anno etc. XXXV^{to} coram proconsule Andres Wetterhans et sociorum eius etc.

Ich Peter Gerhard, burger czu Czwickau, bekenne vor mich, alle myn erbin und thu chunt mit deszim offin briffe, daz ich recht und redelichin mit vorrathe der meynen vorkauft habe uff eyn wydirkauff dem ersamen wysin Andres Wetterhan, burger czu Czwigkau, Anna, synir elichin wirtin, alle iren erbin unde erbnemen czwu margk geldes fryberger monczcze, gelegin im dorffe czu Rybinstorff, dy iczczunt besiczczin der junge Nickel Hornig und habe om dy gegeben ye dy margk von driszig rynischze gulden, dy gut synt am golde, swer gnugk am gewichte, dy er mir gancz und gar fromlichen und nuczlichen bezalt hat. Und ich habe an den selbigin Andres Wetterhan, Annan, syne eliche wirtyn an alle syne erbin und erbnemen williglichen vorwysit und heyszin huldin den obgnantin myn zinszman mit allen \ rechtin und renthin, alz sy meyn vater uf mich geerbit hat, und ich mit den mynen biz daher gehabt habin. Auch sal ich obgnanter Peter Gerhard noch alle myn erbin an dem selbigin czinszmane nach an allen synen gutern keynirley habin wydir frone noch bethe noch stuwer, alleyne uzgezogin daz gerichte, daz sal ich obgnanter Peter Gerhard und myne erbin habin uf den obgnanten gutern und besiczczern in sulcher undirscheyd, daz ich adir myn erbin daz gerichte an allin dingen handel in sullen und büsz nemen nach geheysz und rath des vorgnantin Andres Wetterhans und wasz darvon gefellet, daz sal ich an argk mit om an allen dingin gleich teylin. Und wo der vorgnante czinszman synen geschr(iebenen) zinsz nicht gebe uf rechte tazezit, so mag der vorgnante Andres Wetterhan, alle syne erbin und erbnemen darumbe pfendin uff den gutern addir in der stad uffhaldin, wy er will. Auch globe ich